

氏族典第三百三十五卷

劉姓部列傳九

北齊 劉貴

按北齊書劉貴傳貴秀容陽曲人也歷爾朱榮府騎兵叅軍建義初以預定策勳封敷城縣伯尋進爲公建明初除晉州刺史普泰初轉行汾州事高祖起義貴棄城歸高祖於鄴天平四年除御史中尉其年加行臺僕射貴凡所經歷莫不肆其威酷然以嚴斷濟務故見賞於時興和元年卒長子元孫員外郎肆州中正早卒次子洪猷嗣武平末假儀同三司奏門下事

劉豐

按北齊書劉豐傳豐字豐生普樂人也有口辯好說兵事魏永安初除靈州鎮城大都督率戶數萬來奔高祖上豐爲平西將軍南汾州刺史遂與諸將征討平定寇亂入爲左衛將軍王思政據長社世宗命豐與清河王岳攻之遏洧水以灌城將陷豐與慕容紹宗同入船忽有暴風從東北來纜絕漂至城下並爲敵人所害諡曰忠子矚嗣

劉晝

按北齊書劉晝傳晝字孔昭渤海阜城人少孤貧愛學負笈從師服膺無倦河清初州舉秀才入京考策不第在皇建太寧之朝頻上書終不見收天統中卒於家

劉禕

按北齊書劉禕傳禕字彥英彭城人父世明魏兗州刺史禕性弘裕有威重容止可觀魏孝昌中累遷睢州刺史邊人服其威信世宗輔政降書褒獎秩滿還歸鄉里侍父疾竟不入朝父喪沈頓累年非杖不起五子璿玕璞瑗瓚並有志節爲世所稱

劉逖

按北齊書劉逖傳逖字子長彭城叢亭里人也祖芳魏太常卿父鍼金紫光祿大夫逖少聰敏好弋獵騎射魏末徵詣霸府世宗以爲開府行叅軍逖遠離鄉家倦於羈旅發憤自勵專精讀書霸朝人士攸集逖在遊宴之中卷不釋手皇建元年除太子洗馬肅宗崩從世祖赴晉陽除散騎侍郎和士開寵要逖附之授中書侍郎入典機密聘周還拜儀同三司世祖崩出爲江州刺史祖珽執政徙爲

仁州刺史還待詔文林館重除散騎常侍奏門下事未幾與崔季舒等同時被戮子逸民開府行參軍

劉簪

按北齊書劉逖傳逖弟簪少聰明好文學天統武平之間歷殿中侍御史周大象末卒於黎州治中子元道定州騎兵參軍

劉軌思

劉敬和

按北齊書劉軌思傳軌思渤海人也說詩甚精少事同郡劉敬和敬和事同郡程歸則故其鄉曲多爲詩者軌思天統中任國子博士

劉儒

按北齊書文苑傳序祖珽奏立文林館於是更召引文學士太尉中兵參軍劉儒等並入館待詔

劉顥

按北齊書劉逖傳逖從子顥字君卿祖廐魏尚書爲高祖所殺顥父濟及濟弟琰俱奔江南顥出後

武定中從琰還北琰賜爵臨穎子顥好文學工草書歷瀛州外兵叅軍司空功曹隋開皇中鄆州司馬卒

北周 劉亮

按周書劉亮傳亮中山人也本名道德祖祐連魏蔚州刺史父持真鎮遠將軍亮少倜儻普泰初從賀拔岳西征以功拜大都督封廣興縣子侯莫陳悅害岳亮與諸將謀迎太祖悅平悅之黨幽州刺史孫定兒仍據州不下太祖令亮襲之亮將二十騎先登靈於近城高嶺卽馳入城中磨兵斬定兒賊黨降服魏孝武西遷以迎駕功除使持節左大都督南秦州刺史大統元年以復潼關功進位車騎大將軍遷開府儀同三司大都督進爵長廣郡公亮以勇敢見知爲時名將太祖曰卿文武兼資卽孤之孔明也乃賜名亮并賜姓侯莫陳氏十年出爲東雍州刺史卒子昶大象中位至柱國秦靈二州總管封彭國公昶弟靖天水郡守靖弟恭開府儀同三司饒陽縣伯恭弟幹上儀同三司褒中侯

按周書劉雄傳雄字猛雀臨洮子城人也大統中起家爲太祖親信除子城令賜姓宇文氏孝閔帝踐阼進車騎大將軍天和二年遷駕部中大夫封周昌縣伯遷軍司馬進爵爲侯建德初授納言二年轉內史中大夫以爲河州刺史皇太子西征吐谷渾雄自涼州從滕王道率軍先入渾境功居多軍還加上開府儀同三司從平并州拜上大將軍進爵趙郡公出鎮幽州宣政元年突厥寇幽州雄臨陣戰歿子昇嗣授儀同大將軍

劉璿

按周書劉璿傳璿字寶義沛國沛人也六世祖敏徙居廣陵父臧梁天監初爲著作郎璿少好讀書兼善文筆宣豐侯蕭循出爲北徐州刺史請爲記室參軍梁元帝承制授樹功將軍鎮西府諮議參軍元帝以循紹鄱陽之封且爲雍州刺史復以璿爲循北平府司馬及武陵王紀稱制於蜀累遣召璿使者八返乃至苦求還乃厚其贈而遣之還至白馬西屬達奚武軍已至南鄭璿不得入城遂降太祖素聞其名見之如舊以爲中外府記室尋遷黃門侍郎儀同三司世宗初授內史中大夫掌詔詰在職清白簡亮不合於時左遷同和郡守天和三年卒

劉志

按周書裴果傳劉志弘農華陰人本名思漢太尉寬十世孫也高祖隆宋馮翊郡守後屬赫連氏入寇避地河洛因家於汝潁祖善魏雍州刺史父瓌汝南郡守志少好學魏正光中以明經徵拜國子助教除行臺郎中永安二年轉征國將軍永熙二年除安北將軍廣州別駕三年齊神武舉兵入洛孝武西遷志遣間使奉表長安神武遣兵攻圍城陷潛遁得免大統三年太祖遣獨孤信復洛陽志糾合義徒舉廣州歸國封華陰縣男世宗出牧宜州太祖以志爲幕府司錄世宗卽位除車騎大將軍儀同三司進爵武鄉縣公賜姓宇文氏高祖嗣位授驃騎大將軍拜刑部中大夫志執法平允甚得時譽遷成州刺史天和五年卒子子明嗣子明歷官絳州別駕隋文帝踐極除行臺郎中順陽郡守子明弟子陵涼州別駕隋開皇初拜姑臧郡守歷衛州蔚州長史幽州總管府長史

劉祥

按周書劉璠傳璠子祥字休徵幼而聰慧號神童其伯父黃門郎璆有名江左在嶺南聞而奇之乃令名祥字休徵後以字行解褐梁宜豐侯主簿遷記室叅軍江陵平隨例入國齊公憲以其善於詞

令召爲記室累遷車騎大將軍尋以去官領長安令大象二年卒

劉盈

按周書蕭詧傳劉盈彭城人以西中郎府錄事參軍隨詧之鎮有器度勤於在公詧之軍國經謀頗得參預歷黃門郎中書監雍州刺史尙書僕射歸之七年卒贈本官第三子然於時頗知名隋鷹擊郎將

隋 劉昉

按隋書劉昉傳昉博陵望都人也父孟良從魏武入關周太祖以爲東梁州刺史昉性輕狡周武帝時以功臣子入侍皇太子及宣帝嗣位以技佞見狎寵冠一時及帝不豫召昉入臥內屬以後事昉見靜帝幼冲遂與鄭譯謀引高祖輔政及高祖爲丞相以昉有定策功拜上大將軍封黃國公昉頗有驕色然性粗疎溺於財利恩禮漸薄高祖受禪進位柱國閒居無事不復任使昉自以佐命元功中被疎遠鬱鬱不得志時柱國梁士彥宇文忻俱失職忿望昉並與之交因謀反事泄下詔誅之

劉方

按隋書劉方傳方京兆長安人也仕周以戰功拜上儀同高祖爲丞相賜爵河陰縣侯高祖受禪進爵爲公歷甘瓜二州刺史仁壽中交州俚人李佛子作亂楊素言方有將帥之略於是詔方爲交州道行軍總管統二十七營而進佛子懼而降尋授驩州道行軍總管經略林邑大業元年軍至海口林邑王梵志遣兵守險方擊走之逕馬援銅柱南行八日至其國都梵志棄城奔海刻石紀功而還方在道遇患卒子通仁嗣

劉炫

按隋書劉炫傳炫字光伯河間景城人也少以聰敏見稱周武帝平齊瀛州刺史宇文充引爲戶曹從事以吏幹知名奉敕與王劭同修國史俄直門下省以待顧問又除殿內將軍時牛弘奏請購求天下遺逸之書炫遂僞造書百餘卷題爲連山易魯史記等錄上送官取賞而去後有人訟之坐除名歸於家以教授爲務太子勇聞而召之既至京師敕令事蜀王秀及蜀王廙與諸儒修定五禮授旅騎尉楊達舉炫博學有文章射策高第除太學博士歲餘以品卑去任歸河間於時羣盜蜂起經籍道息炫與妻子聲問斷絕其門人多隨盜賊哀炫窮乏詣郡城下索炫郡官乃出炫與之未幾賊

爲官軍所破炫飢餓無所依凍餒而死

劉弘

按隋書劉弘傳弘字仲達彭城叢亭里人魏太常卿芳之孫也少好學有行檢重節槩仕齊西楚州刺史及齊亡周武帝以爲本郡太守尉迴之亂也弘勒兵拒之以功授儀同平陳之役表請從軍以功封漢澤縣公拜泉州刺史會高智慧作亂以兵攻州弘城守百餘日救兵不至爲賊所害子長信襲爵

劉行本

按隋書劉行本傳行本沛人也父瓌仕梁歷職清顯行本起家武陵國常侍遇肅修以梁州北附遂與叔父璠同歸於周寓居京兆之新豐每以諷讀爲事宇文護引爲記室武帝親總萬幾轉御正中士累遷掌朝下大夫及宣帝嗣位多失德行本切諫忤旨出爲河內太守高祖踐阼徵拜諫議大夫未幾遷黃門侍郎在職數年拜太子左庶子以本官領大興令權貴憚其方直無敢至門者未幾卒

官

劉臻

按隋書劉臻傳臻字宣摯沛國相人也父顯梁尋陽太守臻舉秀才爲邵陵王東閣祭酒元帝時遷中書舍人江陵陷沒復歸蕭管以爲中書侍郎周冢宰宇文護辟爲中外府記室後爲露門學士封饒陽縣子高祖受禪進爵爲伯皇太子勇引爲學士甚愛狎之臻無吏幹又性恍惚耽悅經史終日覃思至於世事多所遺忘性好噉蜚以音同父諱呼爲扁螺其疎放多此類也精於兩漢書時人呼爲漢聖開皇十八年卒

劉訥

按隋書劉臻傳臻位儀同皇太子勇引爲學士有劉訥者亦任儀同俱爲太子學士情好甚密臻住城南訥住城東

劉祐
劉輝

按隋書劉祐傳祐滎陽人也開皇初爲大都督封索盧縣公其所占候合如符契高祖甚親之初與張賓劉輝馬顯定曆後奉詔撰兵書十卷名曰金韜

劉權

按隋書劉權傳權字世略彭城豐人也祖軌齊羅州刺史權仕齊行臺郎中及齊滅周武帝以爲假淮州刺史高祖受禪以車騎將軍領鄉兵後從晉王廣平陳以功進授開府儀同三司開皇十二年賜爵宗城縣公煬帝嗣位拜衛尉卿大業五年從征吐谷渾留鎮西境在邊五載諸羌懷服徵拜司農卿尋爲南海太守有異政遇盜賊羣起豪帥多願推權爲首子世徹密遣人齎書詣權諷令舉兵權斬其使竟無異圖卒官世徹倜儻不羈爲兗州賊徐圓朗所殺權從父烈字子將美容儀有器局官至鷹揚郎將有子德威知名於世

劉曠

按隋書劉曠傳曠不知何許人也性謹厚每以誠恕應物開皇初爲平鄉令在職七年風教大洽及去官吏人無少長號泣於路高潁疏言其狀上召見勞之下優詔擢拜莒州刺史

劉士儁

按隋書劉士儁傳士儁彭城人也性至孝丁母喪絕而復蘇者數矣勺飲不入口者七日廬於墓側

古今圖書集成
負土成墳列植松柏狐狼馴擾爲之取食高祖受禪表其門閭

劉焯

按隋書劉焯傳焯字士元信都昌亭人也父洽郡功曹焯聰敏沉深以儒學知名爲州博士刺史趙
張引爲從事舉秀才射策甲科除員外將軍洛陽石經至京師文字磨滅莫能知者奉敕與劉炫等
考定後因國子釋奠與炫二人議論深挫諸儒咸懷妒恨遂爲飛章所謗除名爲民於是優游鄉里
專以教授著述爲務廢太子勇聞而召之未及進謁詔令事蜀王久不至王大怒遣人枷送於蜀王
以罪廢焯又與諸儒修定禮律除雲騎尉煬帝即位遷太學博士俄以疾去職數年復被徵大業六
年卒

劉元進

按隋書楊元感傳餘杭劉元進少好任俠爲州里所宗煬帝興遼東之役百姓騷動元進陰有異志
遂聚衆合亡命會帝復征遼東楊元感起於黎陽元進知天下思亂於是舉兵應之三吳苦役者莫
不響至旬月衆至數萬將渡江而元感敗吳郡朱爰晉陵管崇共迎元進奉以爲主據吳郡稱天子

帝令將軍吐萬緒光祿大夫魚俱羅率兵討焉燹戰死元進趣建安俄而二將俱得罪帝令王世充發淮南兵擊之元進將兵拒戰人各持茅因風縱火世充大懼將棄營而遁遇反風火轉元進退世充簡銳卒擊破之自是頻戰輒敗元進管崇俱爲世充所殺

劉子翊

按隋書劉子翊傳子翊彭城叢亭里人也父徧齊徐州司馬子翊少好學頗解屬文性剛蹇有吏幹仕齊殿中將軍開皇初爲南和丞累轉秦州司法參軍事十八年入考功楊素奏爲侍御史仁壽中爲新豐令有能名大業三年除大理正擢授治書侍御史每朝廷疑議子翊爲之辨析多出衆人意表從幸江都值天下大亂子翊因侍切諫由是忤旨令爲丹陽留守尋遣於上江督運爲賊所擄見害

劉善經

按隋書劉善經傳河間劉善經博物洽聞尤善詞筆仕歷著作佐郎太子舍人著酬德傳三十卷諸劉譜三十卷四聲指歸一卷行於世

古今圖書集成
劉斌

按隋書劉斌傳南陽劉斌頗有詞藻官至信都郡司功書佐竇建德署爲中書舍人建德敗復爲劉黑闥中書侍郎與劉黑闥亡歸突厥不知所終

劉穀

按萬姓統譜穀彭城人時庾季才篤信義好賓遊常吉日良辰與琅琊王褒河東裴政宗人信等爲文酒之會穀亦預焉

劉忬

按萬姓統譜忬昌平人初爲范陽裨將積功至雄武軍使廣墾田節用度以辦治稱遷涿州刺史得衆心擢御史中丞封彭城郡公卒諡曰恭

唐一 劉文靜

按唐書劉文靜傳文靜字肇仁自言系出彭城世居京兆武功父韶仕隋戰死文靜以死難子襲儀同大業末爲晉陽令高祖爲唐公鎮太原文靜深自結坐李密姻屬繫獄秦王私入視之共定大計

陰部署賓客舉兵唐公乃開大將軍府以文靜爲司馬使始畢可汗尋拒屈突通於潼關其將桑顯和苦闕文靜以奇兵從後掩之通欲引而東文靜命將追執之徇新安以西皆下進魯國公唐公踐天子位擢納言授民部尙書從秦王鎮長春宮文靜自以材能過裴寂遠甚又屢有軍功而寂獨用故舊恩居其上意不平每論政多戾駁會家數有怪召巫爲禳文靜妄失愛告其兄上變遂下吏秦王以文靜首決非常計宜賜全省帝素疏忌之寂又言文靜多權詭而性猜險恐爲後憂帝遂殺之

劉師立

按唐書裴寂傳劉師立宋州虞城人始事王世充爲親將洛陽平當誅秦王壯其才引爲左親衛建成之覺師立參奉密議錄功拜左衛率遷左驍衛將軍襄武郡公羅藝反詔師立檢校右武侯大將軍藝平有司劾黨與師立坐與善除名尋以藩邸舊檢校岐州都督轉始州刺史卒諡曰肅

劉義節

按唐書裴寂傳劉義節并州人隋大業末補晉陽鄉長富於財裴寂薦之唐公從平京師爲鴻臚卿遷太府封葛國公義節本名世龍子名鳳昌父子非人臣兆高祖更賜今名貞觀初轉少府監坐罪

廢爲民徙嶺南終欽州別駕從子思禮武后時爲箕州刺史謀反斬於市

劉世讓

按唐書薛萬均傳劉世讓字元欽京兆醴泉人仕隋爲徵仕郎高祖入長安授安定道行軍總管率兵拒薛舉戰不勝與弟寶皆沒於賊舉令至城下給說使降世讓陽許之至則告守者曰賊兵極於此矣善自固舉重其節不加害舉平授彭州刺史俄領陝東道行軍總管討呂崇茂於夏縣軍敗爲賊所囚聞獨孤懷恩有逆謀亡歸白發之封弘農郡公母喪起爲并州總管襄邑王神符鎮并州世讓數以氣陵之坐是削籍徙康州未幾召授廣州總管帝問以備邊策答曰突厥南寇恃有馬邑爲地耳帝乃使馳驛經略世讓至突厥患之縱反間云世讓與可汗爲亂帝不之察因誅之

劉德威

按唐書劉德威傳德威徐州彭城人隋大業末從裴仁基討賊後歸李密密降俱入朝授左武侯將軍封滕縣公詔將兵擊劉武周爲武周所獲拔歸盡上賊中虛實高祖嘉納改彭城縣公貞觀初歷大理卿綿州刺史入爲大理卿後遷刑部尙書永徽三年卒官諡曰襄